

# **Pwyllgor Datblygu Economaidd**

## **Adroddiad i'r Cyfarfod Llawn o Dan Reol Sefydlog 9.9**

**Ebrill 2000 hyd at Fawrth 2001**

### **Cyflwyniad**

1. Mae'r Pwyllgor Datblygu Economaidd yn un o saith pwyllgor pwnc Cynulliad Cenedlaethol Cymru. Nodir cyfrifoldebau'r pwyllgorau pwnc yn Rheolau Sefydlog y Cynulliad Cenedlaethol, y gwelir rhan ohonynt yn Atodiad A.
2. Gwneir yr adroddiad hwn o dan Reol Sefydlog 9.9, sy'n ei gwneud yn ofynnol i'r Pwyllgorau Pwnc adrodd i'r Cynulliad o bryd i'w gilydd ynglyn â'u cynnydd o ran cyflawni eu Blaen-raglen Waith. Mae'r adroddiad hwn yn ymdrin â gweithgareddau'r Pwyllgor o fis Ebrill 2000 hyd at ddiwedd tymor y gwanwyn 2001.

### **Aelodaeth y Pwyllgor**

3. Cadeirydd y Pwyllgor yn ystod y flwyddyn oedd Val Feld. Ei aelodau eraill ar hyn o bryd yw Alun Cairns, Chris Chapman, Glyn Davies, Ron Davies, Mike German (y Dirprwy Brif Weinidog a'r Gweinidog dros Ddatblygu Economaidd), Chris Gwyther, Alison Halford, Brian Hancock, Dafydd Wigley a Phil Williams.
4. Newidiodd aelodaeth y Pwyllgor yn ystod y cyfnod: ym mis Ebrill 2000 roedd iddo 9 aelod a chynyddodd y nifer i 11 o'r cyfarfod a gynhaliwyd ar 15 Tachwedd ymlaen. Cafwyd newidiadau hefyd o ran y bobl sy'n gwasanaethu'r Pwyllgor ar ôl i Brian Gibbons, Helen Mary Jones, a Rhodri Morgan (fel Prif Weinidog a'r Gweinidog dros Ddatblygu Economaidd) roi'r gorau iddi ar ôl bod yn aelodau am ran o'r flwyddyn.

### **Cylch Gorchwyl y Pwyllgor**

5. Mae cylch gorchwyl y Pwyllgor yn seiliedig ar bortffolio'r Dirprwy Brif Weinidog a'r Gweinidog dros Ddatblygu Economaidd sydd ar hyn o bryd yn cynnwys:

- Buddsoddi mewnol a masnach, hyrwyddo cwmnïau brodorol a datblygu rhanbarthol;
- Materion economaidd Ewropeaidd, gan gynnwys y cronfeydd strwythurol;
- Arloesi, ynni a datblygiadau TGCh yn y sector busnes;
- Polisiâu diwydiannol a chymorth busnes, gan gynnwys materion cyflogaeth o ochr y galw (isafswm cyflog, amseroedd gweithio, etc);
- Twristiaeth.

6. Mae hyn yn cynnwys arolygu Awdurdod Datblygu Cymru (WDA) a Bwrdd Croeso Cymru.

## Blaenoriaethau'r Pwyllgor

7. Nodwyd blaenoriaethau'r Pwyllgor ar gyfer y flwyddyn yn ei Flaen-raglen Waith ar gyfer y cyfnod rhwng mis Mai 2000 a mis Rhagfyr 2001. Roedd y rhain y deillio o gamau gweithredu a nodwyd yn "Gwell Cymru" a oedd yn nodi nifer o faterion y dylai'r Cynulliad fynd i'r afael â hwy ar frys. Cytunodd y Pwyllgor i gymryd rhan yn y broses o ddatblygu'r camau a nodwyd ym Mhennod 5 'Gwell economi, economi gryfach' ac ym Mhennod 4 'Gwell cyfleoedd dysgu'. Yn arbennig:

- Strategaeth datblygu economaidd genedlaethol i hybu swyddi a mentergarwch
- Strategaeth Ewropeaidd effeithiol a chorff newydd i helpu i'w chyflwyno
- Cronfa ddatblygu i helpu busnesau bach a chanolog
- Gwasanaeth allforio wedi'i ailwampio ac ymgyrch farchnata fodern i Gymru
- Strategaeth yr oes wybodaeth i helpu Cymru gyfan i fanteisio ar yr uwch-briffordd wybodaeth
- Gwell cysylltiadau rhwng addysg a busnes
- Hyrwyddo mentergarwch

## Cyfarfodydd a gynhaliwyd

8. Erbyn diwedd tymor y gwanwyn 2001 (cynhaliwyd y cyfarfod olaf ar 4 Ebrill) roedd y Pwyllgor wedi cynnal 18 o gyfarfodydd rheolaidd – yr oedd 3 ohonynt yn golygu cydweithio â phwyllgorau pwnc eraill. Yn ogystal, cynhaliodd sesiynau briffio anffurfiol ar sawl achlysur gan gynnwys un ar ei waith ar yr Adolygiad o Gymorth Busnes a'r Strategaeth Datblygu Economaidd Genedlaethol. Cyfarfu hefyd â Phwyllgor Masnach a Buddsoddi Economaidd Cynulliad Gogledd Iwerddon am drafodaeth anffurfiol yn ystod ei ymweliad â Chymru.

9. Aeth y Pwyllgor, yng nghyswllt Adolygiad yn bennaf, ar ymweliadau i Iwerddon a Brwsel i gwrdd â chynrychiolwyr nifer o wledydd Ewropeaidd. Cynhaliodd hefyd brosesau ymgynghori eang ag eraill ym maes datblygu economaidd o fewn y DU. Cafodd manylion y gwaith hwn eu cynnwys yn Adroddiad y Pwyllgor ac amgaeir darn ohono yn Atodiad B.

## Dull Gweithred

10. Mae'r Pwyllgor wedi parhau i ddatblygu ei ddull agored a chynhwysol o weithredu. Bu'n awyddus i glywed gan sefydliadau sy'n ymwneud â datblygu economaidd ac i gydweithio'n agos â hwy a threfnodd gyfarfodydd gydag amrywiaeth eang o gyrff. Ceir manylion y rhain yn Atodiad B ac mewn rhannau eraill o'r adroddiad o ran agweddau eraill ar y gwaith.

11. Mae'r Pwyllgor yn cydnabod pa mor gyflym y mae'r economi'n symud ac mae wedi gwneud dilyn pynciau llog a materion sy'n codi yn un o'i flaenoriaethau. Er mwyn gwneud hyn, trefnodd ei agenda'n hyblyg – gan gadw cydbwysedd rhwng yr angen i ystyried datblygiadau presennol yr economi gyfan yn ofalus a'r angen i fod yn ymwybodol o faterion brys ac ymateb iddynt ar unwaith.

12. Yn arbennig, cytunodd yr Aelodau y dylai'r Gweinidog dros Ddatblygu Economaidd wneud adroddiad ar y datblygiadau ymhob cyfarfod ac y dylai gyflwyno ei adroddiad ysgrifenedig cyn gynted â phosibl cyn y cyfarfod er mwyn sicrhau ei fod mor ddiweddar â phosibl. Cyfarfu'r Pwyllgor ddwywaith, fyr rybudd, i gynnal trafodaethau ar feddiannu cwmni Hyder. Cyfarfu â chynrychiolwyr o Corus, a'r ISTC, i ganfod yr wybodaeth ddiweddaraf ar sefyllfa sy'n newid yn gyflym ac sy'n effeithio ar y diwydiant dur yng Nghymru. Mae'r Pwyllgor hefyd wedi bod ar bigau'r drain i ystyried pecyn cymorth arfaethedig y Cynulliad gyda phwyllgorau eraill, ond gohiriwyd cyhoeddi hwn ar gais yr undebau. Yn fwy diweddar, cynhaliodd y Pwyllgor drafodaeth frys a oedd yn cynnwys cynrychiolwyr o'r WDA, y Bwrdd Croeso ac Awdurdod Twristiaeth Prydain (BTA) ar effaith clwy'r traed a'r genau ar economi an-amaethyddol Cymru.

13. Gweithiodd y Pwyllgor yn agos â Phwyllgorau eraill – cynhaliwyd trafodaethau Glas Cymru ar y cyd â Phwyllgor yr Amgylchedd a Chynllunio. Mae hefyd yn bwriadu cynnal trafodaethau a'r Pwyllgor Addysg a Dysgu Gydol Oes os bydd y colledion swyddi a fygythiwyd gan Corus digwydd, ac ar eu hadolygiad o addysg uwch. Gwahoddwyd yr aelodau hefyd i fynychu cyfarfodydd y Pwyllgor Amaethyddiaeth a Datblygu Gwledig pan oedd yn cymryd tystiolaeth yn ymwneud â'i Adolygiad o Amrywiaeth Economaidd Gwledig. Ystyriodd y Pwyllgor botensial economaidd y sector diwylliannol mewn trafodaeth ar adroddiad 'Diwylliant Cytûn' y Pwyllgor Diwylliant.

## **Gwaith a Chyflawniadau dros y flwyddyn ddiwethaf**

14. Canolbwyntiodd gwaith y Pwyllgor dros y flwyddyn ddiwethaf ar nifer o feysydd allweddol:

**RhS 9.7(i) – cyfrannu at ddatblygu polisiau'r Cynulliad o fewn y meysydd y mae'r Ysgrifennydd Gwladol yn atebol i'r Cynulliad amdanynt;**

### **Adolygiad o Gymorth a Datblygu Busnes**

15. Mae Atodiad B yn rhoi manylion y gwaith a gafodd ei wneud yn yr adolygiad hwn. Cyhoeddodd y Pwyllgor ei adroddiadau ym mis Chwefror 2001 ac fe'i trafodwyd yn y cyfarfod llawn ar 8fed Chwefror. Yn dilyn hyn lansiodd y Gweinidog dros Ddatblygu Economaidd broses ymgynghori y bwriedir iddi

ddod i ben ddechrau mis Mai.

16. Roedd yr adroddiad yn cynnwys nifer o argymhellion pwysig. Roedd yn annog, yn arbennig, sefydlu Bwrdd Polisi Economaidd i oruchwylio gweithredu a datblygu cymorth i fusnesau a sefydlu Porth Cymorth i Fusnesau fel man cychwyn pob cymorth i fusnesau. Cynigiodd y dylid rheoli'r olaf o'r rhain drwy'r Awdurdod Datblygu. Ceir manylion pellach am y rhain ac argymhellion eraill y Pwyllgor yn adroddiad yr adolygiad.

## **Strategaeth Datblygu Economaidd Genedlaethol**

17. Mae'r Pwyllgor o'r farn bod ar Gymru angen Strategaeth Datblygu Economaidd glir ac mae'n treulio cryn dipyn o'i amser yn cynorthwyo'r Gweinidog dros Ddatblygu Economaidd i ddatblygu hon. Yn ystod y flwyddyn, cynhaliodd nifer o gyfarfodydd i ystyried blaenoriaethau'r strategaeth a materion manylach. Clywodd dystiolaeth gan y Gwasanaeth Cyflogi ac Anabledd Cymru mewn cyfarfod yn canolbwyntio ar yr hyn sy'n rhwystro gweithgarwch economaidd. Dro arall, trafododd bapur Adrannol ar ddatblygu cynaliadwy a phapur ar ynni adnewyddadwy. Yn fwy diweddar gwrandodd ar farn Cyswllt Bywyd Gwyllt a Chefn Gwlad Cymru. Ystyriodd hefyd bapurau ar flaenoriaethau sectoraidd gan gynnwys asesiad trylwyr o rôl ac effaith canolfannau galw yng Nghymru.

18. Daeth y cam cyntaf o ddatblygu'r Strategaeth i ben y mis Chwefror pan gyflwynodd y Gweinidog yr adroddiad yn y cyfarfod llawn fel sail ar gyfer ymgynghori. Mynegodd yr aelodau eu pryderon am yr adroddiad yn ei ffurf bresennol ond nodwyd mai bwriad y Gweinidog dros Ddatblygu Economaidd oedd ei gyhoeddi fel sail ar gyfer ymgynghori pellach. Mae'r Pwyllgor a'r Gweinidog yn cydnabod mai dim ond y cam cyntaf yn y broses o ddatblygu strategaeth economaidd yw hyn ac mae'r Pwyllgor yn bwriadu parhau i gyfarfod sefydliadau allanol a gwranddo ar eu safbwyntiau er mwyn gwella a datblygu'r gwaith hwn.

19. Mynegodd y Pwyllgor ddymuniad cryf i ddatblygu cynlluniau cymorth gweithredol yng Nghymru a galwodd ar y Gweinidog i ganiatáu i'r Cynulliad gyflwyno cynlluniau o'r fath.

## **RhS 9.7(ii) – cadw llygad ar y gwariant a'r weinyddiaeth sy'n gysylltiedig â'u gweithredu.**

### **Cronfeydd Strwythurol Ewrop**

20. Mae'r Pwyllgor Datblygu Economaidd wedi cymryd rhan flaenllaw yn y broses o ddatblygu rhaglenni Cronfeydd Strwythurol Ewrop, a dros y flwyddyn mae wedi ystyried a rhoi cyngor ar ddogfennau cronfeydd strwythurol y Cynulliad sawl gwaith.

21. Teimla'r Pwyllgor ei bod yn hanfodol parhau i gynnal trosolwg o ddatblygiadau'r cronfeydd, ac yn ogystal â thrafod y datblygiadau â'r Gweinidog dros Ddatblygu Economaidd, mae'n derbyn adroddiadau rheolaidd gan Brif Weithredwr Swyddfa Cyllid Ewropeaidd Cymru (WEFO) a chan Gadeiryddion y

Pwyllgorau Monitro Rhaglenni (PMC). Agorodd Cadeirydd y Pwyllgor, ynghyd â'r Gweinidog, gyfres o gyfarfodydd Cadeiryddion a chynrychiolwyr y PMC ar gyfer Amcan 1, 2 a 3.

22. Mae'n rhaid gwneud mwy i ddatblygu a gwella'r modd y mae'r Pwyllgor Datblygu Economaidd yn cynnal trosolwg gweithredol o'r datblygiadau ynglyn â'r cronfeydd strwythurol tra'n cydnabod cyfrifoldebau ac atebolrwydd ffurfiol WEFO a'r PMC.

### **Cyllideb Datblygu Economaidd**

23. Cymerodd y Pwyllgor ran flaenllaw yn y broses o sefydlu'r blaenoriaethau ar gyfer cyllideb datblygu economaidd y Cynulliad, o ystyried papur ar flaenoriaethau yn haf 2000 i archwilio'r gyllideb fanwl ddrafft yn yr hydref. Bydd hefyd yn derbyn adroddiadau gan y Gweinidog ar ôl i newidiadau gael eu gwneud yn ystod y flwyddyn ac mae'n parhau i ymwneud â newidiadau ar gyfer y dyfodol.

24. Nododd y Pwyllgor yr angen i gael mwy o eglurder wrth nodi ffynonellau arian cyfatebol a chydabu y byddai absenoldeb arian cyfatebol llawn gan Drysorlys ei Mawrhydi yn golygu y byddai rhaglenni'r Cronfeydd Strwythurol yn llai effeithiol nag y byddent fel arall.

25. Roedd y Pwyllgor yn awyddus i sicrhau mwy o eglurder o ran ffynonellau a dosbarthiad yr adnoddau a ddefnyddir i fynd i'r afael â chanlyniadau cau Corus.

### **Y Swyddfa Ystadegau Genedlaethol**

26. Un o flaenoriaethau'r Pwyllgor yw cael gwybodaeth gadarn i seilio ei waith monitro a chynllunio economaidd arni. Mae wedi ystyried papurau gan y Swyddfa Ystadegau Genedlaethol ar ddatblygiadau or ran yr wybodaeth a gasglwyd ac yn derbyn adroddiadau rheolaidd ganddynt ar hyn.

### **Cymorth Dethol Rhanbarthol**

27. Ystyriodd y Pwyllgor bapur manwl ar y modd y mae Cymorth Dethol Rhanbarthol yn gweithredu yng Nghymru ac mae wedi ystyried yr opsiynau ar gyfer ei ddatblygu. Gofynnodd y Pwyllgor am adroddiadau rheolaidd fel y gall gadw golwg cyson ar y cymorth a ddarperir i fusnesau yng Nghymru, ac ar y cynllun a'r ffordd y mae'n gweithredu.

### **RhS 9.7(iii) – cadw llygad ar waith cyflawni'r swyddogaethau cyhoeddus yn y meysydd hynny gan gyrff cyhoeddus, gwirfoddol a phreifat:**

#### **Awdurdod Datblygu Cymru**

28. Mae'r Pwyllgor yn gweithio'n agos gydag Awdurdod Datblygu Cymru. Yn yr hydref rhoddodd ystyriaeth i Adolygiad Hanner Blwyddyn a Chynllun Corfforaethol Drafft y WDA a thrafododd y rhain

gyda'i Gadeirydd a'i Brif Weithredwr. Yn fwy diweddar derbyniodd y Pwyllgor Gynllun Busnes Drafft y WDA a chynghorodd y broses o ddrafftio llythyr arweiniad strategol y Gweinidog dros Ddatblygu Economaidd i'r WDA wrth iddo lunio ei gynllun Corfforaethol ar gyfer 2003-2004 i 2004-2005. Ar yr un pryd, bu'r Cynulliad yn cynnal Adolygiad Pum Mlynedd o'r WDA ac yn yr Hydref gwnaeth y Pwyllgor sylwadau ar ganlyniadau'r cam cyntaf, ac yn fwy diweddar ystyriodd adroddiad terfynol yr Adolygiad.

## **Bwrdd Croeso Cymru**

29. Ystyriodd y Pwyllgor yr Adolygiad o Gyflawniadau Bwrdd Croeso Cymru, gyda'i Gadeirydd a'i Brif Weithredwr. Yn fwy diweddar ystyriodd flaen-raglen y Bwrdd Croeso a chynghorodd y Gweinidog ar ei lythyr cylch gorchwyl i'r Bwrdd ar gyfer 2001-2002.

## **Bae Caerdydd**

30. Mae'r Pwyllgor yn parhau i bryderu am y trefniadau ar gyfer datblygu Bae Caerdydd a'r morglawdd yn dilyn dirwyn Corfforaeth Datblygu Bae Caerdydd i ben. Yn yr hydref derbyniodd yr wybodaeth ddiweddaraf am y datblygiadau gan yr Arglwydd Faer a bu'n aros i weld Cynllun Busnes Awdurdod yr Harbwr. Yn anffodus, gohiriwyd cwblhau hwn ond mae'r Pwyllgor yn disgwyl ei dderbyn yn fuan ar ôl y Pasg. Mae'r Pwyllgor hefyd wedi ystyried a gwneud sylwadau yn ddiweddar ar adroddiad y Pwyllgor Archwilio ar Forglawdd Bae Caerdydd.

## **RhS 9.8 – cyfrifoldebau eraill**

### **Y Mesur Diwygio Rheoleiddol**

31. Mewn ymateb i gais gan y Cyfarfod Llawn, ystyriodd y Pwyllgor fesur diwygio rheoleiddiol arfaethedig y Llywodraeth a gyhoeddwyd yn araith y Frenhines. Cynghorodd y cyfarfod llawn ar hwn.

### **Blaen-raglen Waith**

32. Ar adeg ysgrifennu'r papur hwn, mae'r Pwyllgor wrthi'n rhoi'r wedd derfynol ar ei raglen waith ar gyfer mis Mai 2001 hyd at fis Rhagfyr 2002. Datblygwyd ei flaenoriaethau o rai'r llynedd. Yn unol â'i swyddogaethau archwilio, bydd yn parhau i gynnal trosolwg fanwl o swyddogaethau'r Gweinidog Datblygu Economaidd a throsolwg fanwl o'r modd y datblygir rhaglenni'r cronfeydd strwythurol ac y gweithredir y WDA a'r Bwrdd Croeso.

33. O ran datblygu polisiau mae'n bwriadu datblygu'r gwaith a gychwynnwyd yn ystod y flwyddyn ddiwethaf – gweithredu ei gynigion o'r adolygiad o ddatblygu busnes, a parhau i ddatblygu'r Strategaeth Datblygu Economaidd Genedlaethol. Bydd hefyd yn ymgymryd ag adolygiad newydd ar sail polisi ynni gan ganolbwyntio ar gynnaladwyedd drwy gyfrwng ffynonellau adnewyddadwy a thechnolegau glân.

## **Atodiadau**

**A. Cyfrifoldebau'r Pwyllgorau Pwnc**

**B. Rhan o'r Adolygiad o Wasanaethau Cymorth a Datblygu Busnes**